

Date – 25/01/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Vairengte leh Sairang inkar National Highway kawng chhia avanga an bungraw phur lirthei an dintir chu kawngpui siam a nih mek avangin nimin tlai atang khan an tlan leh tan.**
- 2. Indian Air Force (IAF) kuta Lengpui Airport hmunhma engemawzat Mizoram sawrkarin hlan a tum chu sut leh se an duh thu Lengpui Airport Forum chuan a sawi.**
- 3. Prime Minister Narendra Modia chuan khua leh tui thain a tihturte tha taka tih hi ram changkanga siamna tur Viksit Bharat hlawhtlinna a ni a ti.**
- 4. Akashvani leh Doordarshan te chuan Republic Day vawi 46-na Kartavya Path-a neih tur live-in an pechhuak dawn.**

<><><>

TRUCKERS

Mizoram Truck Owners Association (MTOA) leh Mizoram Truck Drivers Association (MTDA) ten Vairengte leh Sairang inkar National Highway kawng chhia avanga an lirthei an dintir chu kawngpui siam a nih mek avangin nimin tlai atang khan an hlip a,

MTOA Secretary Pu Dina Tlau sawi danin, Kawnpui leh Khamrang inkara kawng chhe zual, tluk hlauhawm zual te hnawh a nih tak avangte, kawng an la siam dawn zel avangte leh PWD hnathawh dan tur ruahmanna felfai zawk a awm tak avangin an tlan chhunzawm leh ta a, helai kawng siam hnathawh kal mek hi PWD Minister hovin karleh lamah an enho leh dawn a ni.

Puan tawh angin, PWD minister Pu Vanlalhlana chuan Mipuite harsatna hriaiin Mizoram PWD kawng enkawl ni miah lo ah mawhphurhna an la ni a sawiin mipui leh Lirthei neitute pawhin Sorkar thahnemngaihna hriathiam pui thin se an duh a ti a.

Vairengte atanga Sairang inkar National Highway NH-6 chu NHIDCL kuta awm niin engemaw hna laklawhna avangin Mizoram State sawrkar chuan mipui mamawhna hriain a enkawl lailawk a ni a ti a. Mizoram Sorkarin a enkawl hnu hian a thawh khat nan he kawngpui thawmthat nan nikum khan cheng Nuai 75 sen a lo ni tawha, nikum vek khan NHIDCL kuta awm leh tura ruahman a nih laiin, NHIDCL te hian an lak tak si loh avangin Mizoram Sorkar chuan State pawisa a remchang ang ang pawt khawmin, vawiin thleng hian mipuite mamawhna hriain a enkawl chhun zawm leh rih ta a ni, a ti.

PWD Minister chuan, National Highway NH -6 thawmthat hna hi ni 20 atang khan a tum hnih nan thawh tan leh a ni a, tun tum ah hian Cheng Nuai 125 ruahman niin february ni 15 a siam zawh tum a ni a, sum ruahman sa hian

a daih hmel loh avangin Sorkarah dilbelh leh mek a ni a, ngawrh taka siam mek a ni bawk, a ti.

<><><>

LUNGLEI

Lunglei District Bawrsap Pi Navneet Mann chuan a office chamber-ah NHIDCL (National Highways & Infrastructure Development Corporation Limited) hotute leh contractor BRNIPL (BRN Infrastructure Private Limited) ai awhte nimin khan kawmin, Lunglei - Tlabung kawng, National Highway 302 kawngpui laih zauh leh siam that hna thawh mek dinhmun a sawipui.

He hunah hian Lunglei Additional Deputy Commissioner & CALA Pi Rochuangkimi Khenglawt pawh telin, NH-302 (Lunglei - Tlabung) kawng siam mek enkawltu NHIDCL leh hna thawktu BRNIPL te'n an hna thawh chin dinhmun an report a. DC thu pek angin that chhungin kawng chhia leh ngaih-mawhawm zual laite an khawih thu leh hna pangngai pawh a theih anga chaka an kalpui thu sawiin, hna chu zaa 50 vel thawh zawh a nih tawh thu an sawi a. Ram lak tawh china in la that lo leh chhan dang avanga harsatna an tawhte an tar lang bawk.

He hunah hian DC lam chuan hna thawktute chu a that thei ang ber leh chak thei ang bera hna thawk tura hrilhin, fur lo thlen leh huna mipuiin harsatna an tawh loh nan lei laih mek chu laih zawh hman tum turin an chah a. Zangnadawmna chungchang leh kawng chungchanga mipuiin DC hnena harsatna an thlente NHIDCL leh contractor lamin an bawhzui dan sawi ho a ni bawk.

<><><>

LENGPUI AIRPORT FORUM

Indian Air Force (IAF) kuta Lengpui Airport hmunhma engemawzat Mizoram sawrkarin hlan a tum tha tih loh avanga pawl din Lengpui Airport Forum chuan mipuite tana tha lo turah ngaiin hlan lo turin sawrkar an ngen.

Aizawl Press Club-a chanchinthar thehdahtute an kawmnaah Airport Forum Convener Pu Lalthuamliaana chuan, Lengpui Airport la tura Mizoram sawrkarin Airports Authority of India (AAI), Indian Air Force (IAF) bakah Private player a dawr hnuah AAI leh Adani group ten an hnawh avangin IAF-a hlan chu Working Committee ten tha an tih ber avanga Cabinet pawhin a pawmpui tawh a ti a. Lengpui Airport chu IAF kuta hlan pawh ni se, thu delhkih an neih atanga thlirin Mizoram sawrkarin tih tur tam tak a la neih dawn tho avangin tuna an chhuanlam ber sum hloh chu a kian phah a rinawm loh tih a sawi.

Pu Lalthuamliaana chuan, nikum October Ni 16-a Council of Minister thukhawmin IAF kuta Lengpui Airport hlan chungchang an ngaihtuah tuma an thutlukna mipui hriattura thuchhuah siam a ni lo chu mak an tih thu an sawi a, Kum 2011 khan IAF te chuan Lengpui Airport chu fighter thuhruk nan an dil tawh ni a sawiin, sorkar laipui chuan IAF inkulh nan Lengpui Airport hi an awt viau ni a an ngaih thu a sawi a. Lengpui Airport Forum chuan Airport mipui tana tangkai taka hman chu an dah pawimawh ber thu leh IAF kuta hlan turin nawr mah se sorkarin an pawm tur a ni lo an ti bawk.

He huna tarlan anih danin, Mizoram sorkarin a ruahman dan chuan runway leh Air Traffic Control bakah runway sir lehlam ram zawng zawng IAF in an chang anga, a bak zawng terminal building, security, fire services leh ticketing leh a dangte Mizoram Sorkar kutah a la awm zui ang. Hemi awmzia chu IAF in remchang an tih dan angin an kuta awm, runway leh ATC hi civilian flights atan ahawh tir ve dawn tihna a ni a, hetiang arrangement hi 'civil enclaves' tiin an vuah a, Indopui II-na hunlaia sipai airport te civil miten an hmantawm thin an kha a ni an ti. He ruahmanna anga IAF kuta Lengpui airport hlan anih a, runway leh Air Traffic Control an lak chuan Lengpui airport chung a thuneihna zawng zawng IAF kutah hlan a ni tawh tihna a ni anga domestic flights zawng zawng pawh IAF control na hnuaia a awm a ngai tawh ang.

<><><>

MNF

Rajya Sabha MP Pu K. Vanlalvena MNF Gen. Hqrs Adviser chuan VC/LC inthlan tur hun sawn chhan chu hripui, tam leh ramri buai ang chi chhuanlam sawi tur ZPM sawrkar in a nei lo a, party rilru pua ram rorelna a ni a ti.

Nimina MNF Hnam Runa inkhawmah thu sawiin Pu Vanlalvena chuan MNF party chuan ram hmangaihna thinlung puin ro a rel thin a. MNF term liam taah pawh Covid len nasat hma in VC/ LC inthlanna neih zawh vek hman a ni, Covid hrilen avangin thla ruk pawh sei a ni. Congress term ah pawh LC/ VC term pawh tawi a ni ngai lo a ti a, Pu Vanlalvena chuan Kuhva ro ram dang Myanmar atanga lo lut ah MNF mawhpuh a ni a. ZPM an sawrkar hnuaia a ngai rengin Kuhvarah ro chu a lo lut reng tho a, MNF hun laia sawiseltute kha an ngawi ta hian a sawisel tute kha an dik lo a ni, a ti a, ZPM chu a inzawrh ang ngeiin an ti tawp ngei tur a ni, a ti bawk.

Thlaithar lei tur chungchangah poh sorkar inrawlh lovin, rate tha zawkin an hralh thei ang a ti.

He hunah hian MNF President Pu Zoramthanga chuan Local Council leh Village Council Inthlan thuchah a tlangzarh a ni.

<><><>

MPCC

Mizoram Pradesh Congress Committee Friday Political Session Congress Bhavan, Aizawla nimina neihah MPCC Senior Vice President Pu Lalnunmawia Chuaungo chuan thu sawiin, "ZPM party kalphung chu Ram tihchhiata a awm loh nan leh mipuite thlavang hauh nan tun atang chuan an sawi chhuak ve tan tawh dawn a ti.

Mi hausate an hausak belh thur thur ringawt chu ram hmasawna a ni lova, chiang taka kan hmuh chu mipui nawlpui in hma an sawn chuan ramin hma a sawn a ni. Mipui nawlpuiin sum an neih loh a, thil leina tur an neih hleihtheih loh chuan sumdawngte pawhin an tuar thin a. Chuvangin mipui nawlpui kutah sum a luh theih nan NLUP changlung zawk, chhungkaw tin ten an hlawhtlinpui theih tur Congress party chuan hma lak an tum a ti.

Party Adviser Pu John Siamkunga, Ex MLA pawhin thusawiin 14th Finance Commission hnuaih chuan sum reng reng state chan tur ruatsa vek a ni tawh a, a thiam thiam leh a thei thei sawichhuah theih ang a ni tawh lo a. Finance Commission chuan Village Council ten an insem tur kum kal mekah vaibelchhe 76 an pe a, Local Council te tan pawh vaibelchhe 34 vel an rawn pe a, heng zawng zawng hi ruahman sa vek a ni. VC leh LC ah rulling nih kher a ngai lo, an chan tur a in ang vek a ti.

MNF in Kolkatta a Mizoram House, Ballygunge ami chu an hralh a, tunah ZPM in Lengpui Airport hralh an tum leh a, heng te hi thil pawh tak a ni a, ngaihtuah chian a ngai a ni a ti.

<><><>

AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchintha hi puan leh a ni ang.

<><><>

BJP

BJP Mizoram State Office Political Session ah MLA Dr. K. Beichhua, BJP State Core Group Member chuan thusawiin, tuna Mizoramin Sorkar a hrawn mek chu Budget Session vawihnihna thutkhawm leh hunah chuan enchhin Sorkar a nihna a lang chiang leh zual ang a, enchhin an dawl em tih hi mipui te'n an hre zel dawn a ni," a ti.

Dr. K. Beichhua chuan, BJP chuan Vision mumal tak leh Ram hmasawna tur atana tum mumal tak nei a nih zia a lang chiang a, India ram pum hmasawna tur Manifesto-te hmanga ram tana hna an thawhna hi India ram mipuite hian an chhawr meka, mi retheite leh mi hausate tan pawh nasa takin kan hlawk pui mek a ni, a ti.

<><><>

PM

Prime Minister Narendra Modi chuan khua leh tui thain a tihturte tha taka tih hi ram changkanga siamna tur Viksit Bharat hlawhtlinna a ni a ti. Nimin khan Republic Day 2025-na lawmnaa tel tur NCC Cadets, NSS Volunteer, Youth Exchange Programme cadet, tableau artist leh tribal mikhualte nimin khan a chenna 7 Lok Kalyan Marg, New Delhi ah a kawm a. Pu Modi cuan ram inpumkhatna leh hnam hrang hrang lungrual taka chenhona chu a pawimawh thu sawiin inkawmhona telte chu Ek Bharat Shreshtha Bharat chu ti nghet zel turin a chah a ni.



CHHATISGARH MAOIST

Chhatisgarh- Bijapur district-ah Security Force ten Maoist 14 an man, Maoist hel kahhlum zingah pariatte hi an luman cheng nuai 38 lai a ni a. Tekmetia, Nadapalli leh Mallempenta ngaw chhungah Maoist helte hi man ani a. Usoor-Nadapalli kawngpuia bomb kamah puh an ni.



R-DAY

Akashvani leh Doordarshan te chuan Republic Day vawi 46-na Kartavya Path-a neih tur live-in an pechhuak dawn. Nimin khan Union Information and Broadcasting Secreretary Sanjay Jaju hovin Akashvani leh Doordarshan-te inpuahchah dan hi thlrho a ni a. Pu Sanjay Jaju chuan Akashvani leh DDK te inpuahchahna chu tha a tih thu a sawi a ni.

Prasar Bharati CEO Gaurav Dwivedi chuan tun tum Republic Day lawmnaah hian video fiah fai tak a awm theih nan cameraman sang li chuang dah an ni dawn a. Hei hi kum hmasa aiin a let riatin a tam a ti a. Hei bakah hian WAVES OTT plattform ah parade hi tihchhuah a ni bawk ang a ti.

